

Dithero tsa Tirelano mo Kutlwanong

34/2015 Thero ka Sontaga wa 2 morago ga moletlo wa Borarobongwe, e le ka 14. 06 2015

Mo leineng la Modimo o e leng Rara le Morwa le Mowa o o Boitshepo_

Izwi elongamela leliviki lilotshiwe ku-Math. 11:28, lithi: **"Tlaang kwano go nna lotlhe ba lo lapileng, ba lo imelwang; nna ke tla lo lapolosa."**

1. Sefela sa 224 - 210/218
2. **Thapelo:** Morena, o re itshepise mo bommaaruring. Lefoko la gago ke la boammaaruri. Amen.
3. Lefoko la Testamente e kgologolo le kwadilwe mo go Jes. 55:1-5;

Epistolo ka fa thulaganyong ya 2 e kwadilwe mo go Baefeso 2:17-22;

Efangele ka fa thulaganyong ya 3 e kwadilwe mo go Matheo 22:1-14.
4. A go ipolelwe tumelo ya bokeresete!
5. Sefela sa 254 - 236/245
6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Luka 14:15-24, e re: "E rile mongwe wa ba ba ntseng nae fa dijong a utlwa tseo, a mo raya a re: 'Go sego yo o tla jang senkgwe mo pusong ya Modimo.' Jesu a mo fetola a re: 'Motho mongwe o ne a dira moletlo o mogolo, a ba a laletsa ba bantsi. A roma motlhanka wa gagwe ka nako ya moletlo go ya go raya ba ba laleditsweng a re: Tlaang, gonne tsotlhe di setse di baakantswe. Mme botlhe ba ela seopo sengwe, ba simolola go ipata. Wa ntlha a mo raya a re: Ke rekile tshimo, mme ke tshwanetse go ya go e bona; ke a go rapela, o mpolele gore ke itatile. Yo mongwe a re: Ke rekile dipholo tsa dijoko tse tlhano, mme ke ya go di leka; ke a go rapela, o mpolele gore ke itatile. Yo mongwe a re: Ke nyetse mosadi, ke ka moo ke sa ka keng ka tla. Motlhanka a tla, a bolelela morena wa gagwe dilo tse. Ke fa mong wa ntlo a galefa, a raya motlhanka wa gagwe a re: Akofa o tswele

kwa mebileng le mebilaneng ya motse, o tsise bahumanegi le digole le difofu le batlhotsi kwano. Motlhanka a re: Morena, se o se laotseng se dirilwe, mme manno a sa le teng: Morena a raya motlhanka a re: Tswela kwa ditseleng le dikgorong, mme o ba kgole go tsena gore ntlo ya me e tlale. Gonne ke lo raya ke re: Ga go ope wa banna bao, ba ba laleditsweng, yo o tla utlwang moletlo wa me." Amen.

8. Thero: Phuthego ya Morena, Modimo Rraetsho yo o rategang yo o mo legodimong o re laleletsa dijong, o a re laletsa gore re tle mo lenyalong. A re utlwa taletso ya bopelotlhomogi jwa gagwe? A re a e amogela? A re na le kagiso le boikhutso mo pelong, fa re e utlwa? Gongwe re kakilwe ke tiro? Re itlhaganetseng, re taboga, re latela tsa lefatshe mo go kalo gore re se nne le nako go amogela taletso e ntle ya Morena? Bopelotlhomogi jwa gagwe bo bogolo. Kana molato wa ba ba nyatsang taletso o mogolo go feta. "Motho mongwe o ne a dira moletlo o mogolo, a ba a laletsa ba bantsi. A roma Motlhanka wa gagwe ka nako ya moletlo go ya go raya ba ba laleditsweng a re: 'Tlaang, gonne tsotlhe di baakantswe.' Mme botlhe ba ela seopo sengwe, ba simolola go ipata. Wa ntlha a mo raya a re: 'Ke rekile tshimo, mme ke tshwanestse go ya go e bona; ke a go rapela, o mpolele gore ke itatile.' Yo mongwe a re: 'Ke rekile dipholo tsa dijoko tse tlhano, mme ke ya go di leka; ke a go rapela, o mpolele gore ke itatile.' Yo mongwe a re: 'Ke nyetse mosadi, ke ka moo ke sa ka keng ka tla.'"

Lo a lemoga gore ba bararo ba ga ba tlowe Modimo, nyaya, mme go na le sengwe. Ba tlhokomela dikgang tsa bone fela bogolo go ona, e le dikgang tsa kwa gae, dikgang tsa matsatsi otlhe tsa motse: tshimo, dikgomo, lenyalo, le jj. Ke re: mongwe le mongwe o thaloganya gore ke tse di tshwanetseng tseo, di tshwanetse go dirwa. Le fa go ntse jalo, go ka diragala gore re nyatse Modimo ka ntlha ya tsona. Ke gopola motho yo o neng a tshwaregile ka kgang ya dikgomo mo kgosing ya gagwe phakela ka Sontaga ka metlha. A tlwaetse gore a se ka a tsena kereke. Mo bofelong o ne a sa tlhole a tla mo meletlong. Ke gopola yo mongwe yo o neng a tshwarega ka ntlha ya kgang ya ditomatise mo go kalo gore a lebale Modiri wa gagwe, Modiri wa ditomatise tsa gagwe. Ke gopola yo mongwe yo o neng a tshwarega ka thekisi ya gagwe ka gore a bone madi ka go tabogela kwa le kwa ka Sontaga phakela, a tsamaisa batho ba ba yang kerekeng, mme ene ka nosi, a re: "Intshwarele, moruti, ke tshwaregile go ikgobokanyetsa madi." A simolola go robala mo thekising ya gagwe, a tlogela go robala kwa gae. Mohumagadi wa ga gabo a simolola go leba ba bangwe ka matlho. Bana ba ne ba sa tlhole ba bona rraabo, mokgwetsi yo wa thekisi. Ke gopola

yo mongwe yo o romileng bana ba gagwe ba ba neng ba rata go ya kwa sonto sekole, a ba roma go batla diphafana tse di lesome le bobedi, a tlatsa ka tsona Sontaga wa gagwe le tlhogo ya gagwe e e tlhomolang pelo. Pelo le mowa wa gagwe di ne di sa bone sepe. Ke gopola yo mongwe yo o neng a palelwa ke go kgetha fa gare ga makgarebe. Ka moo o ne kopana mo dikobong le botlhe. Ba re: Ke tla tla, moruti. Ke tla goroga. Ke gopola yo mongwe yo o simolotseng go ineela mo lenyalong la lefufa. Ke fa a ne a gogelwa kwa le kwa fa gare ga metse ya gagwe. Mme bana botlhe ba gagwe ba ne ba gola ba sa itse rraabo, le e seng go ratwa ke ene. Ba utlwa dikganetsanyo fela, botlhe ba tshwenngwa ke mafufegelo le boithato. Motho o ipatletseng lorato, a bona kilano le kgalefo. Ke tshwanetse go bua le wena, moruti. Ka letsatsi lengwe ke tla tla, re buisane. Ke gopola phuthego yotlhe e e neng ya bidiwa mo pitsong ya mapolitiki ka Sontaga phakela. A tota ya kgetha pitso eo bogolo go taletso ya Morena? Tlaang, gonne lo baakanyeditswe tsotlhe, mme botlhe ba ela seopo sa bone, ba simolola go ipata.

Bagaetsho, re dirang ka taletso ya Morena? Nna le wena, re ipata jang? Rotlhe re na le nako mo go tse re di ratang. Se segolo mo botshelong jwa gago ke eng? Nyaya, e seng kajeno, Moruti, ke tshwaregile ka tse dintsi, ka beke e e tlang, ka kgwedi e e tlang, ka ngwaga o o tlang, ka gongwe morago e tla re ke sena go swa mfama, e tla re ke sena go tsofala. Mme jaanong, kajeno, ke kopa gore o mpolele ke itatile. Ke ntse jalo, ke motho, ke gopola taletso e ntle ya Morena, ka nako ya tlalelo ya me, fa ke le mo metsing, ka letsatsi la bokoa. Ke tla gopola tse tsotlhe tseo mo bosigong jwa letshogo, jwa bolwetse, jwa botlhoko. Ke batla botshelo jwa me. Bofelong ke tla latlhela marapo a me a a lwalang, a a tsofetseng mo dinaong tsa Modiri wa me.

“Ya re motlhanka a boa, a bolelela morena wa gagwe dilo tse. Ke fa mong wa ntlo a galefa, a raya motlhanka wa gagwe a re: ‘Akofa o tswela kwa mebileng le mebilaneng ya motse, o tsise bahumanegi le digole le difofu le batlhotsi kwano.’” Modimo ga a pateletse motho, o laletsa gangwe, gabedi. O re letela ka boitshoko gore re tle. Morago o feta mo motseng wa ga etsho, o ya mo go wa mokaulengwe yo o neng a sa solofele gore o tla lalediwa ka ntlha ya kemo ya gagwe. Moletlo o tla tswela, ka gongwe kwa ntle ga rona, lenyalo la Morena le tla jewa, le fa kwa ntle le wena, ntle ne nna. Fa ke sa batle go amogela taletso, ba bangwe ba tla tla. Fa ke ipata ka go gopola gore ga ke tlhoke thuso, yo mongwe o tla thusiwa. Fa ke kgotshe, yo mongwe o tla lalediwa, ke raya yo o lebogelang thuso le taletso. Tlaang, tsotlhe di baakantswe. Tatlhego wee fela mo go nna, fa ke sa batle go amogela taletso!

“Motlhanka a re: ‘Morena, se o se laotseng se dirilwe, mme manno a sa le teng.’” Morena a raya motlhanka a re: ‘Tswela kwa ditseleng le dikgorong, mme o ba kgole go tsena **gore ntlo ya me e**

tlale Gonne ke lo raya ke re: Ga go ope wa banna bao, ba ba laleditsweng, yo o tla utlwang moletlo wa me.” Re tla reng, fa mongwe wa bakwidii (morwa wa bakaulengwe ba ditsela) a batla go khubama mono fa thoko ga rona, e le letagwa, seaka, nonyane ya toronko, gongwe mongwe wa bana ba ba bidiwang “street children”. Morena, se o se laotseng se dirilwe, mme manno a sa le teng. Lefoko leo le a re tlhotlheletsa, le re tsoseletsa, le go re tshedisa gore re laletse ba ba sa ntseng ba le kgakala, re laletse ba ba timetseng, re laletse ba ba se nang tsholofelo, re laletse ba ba se nang kgomotso, re re: Tlaang tsotlhe di baakantswe!

Morena Jesu Keresete o re laletsa gore re amogele selalelo se se boitshepo, re je, re nwe botshelo, kagiso ya segakolodi, re itshwarelwe maleo, re tiisiwe mo tumelong, re ijele, re inwele letlhogonolo le le sa khutleng, e bong pholoso ya mewa ya rona. Taletso ya gagwe ke neo. Re khubama go amogela thata e ntšhwa ka boitumelo jo bo sa khutleng. Go tshegofaditswe yo o jang senkgwe mo pusong ya Modimo. Modimo a o re thuse mo go tseo ka bopelotlhomogi jwa ona. Amen.

9. Thapelo: Modimo o o kutlwelobotlhoko, Rara yo o rategang, ka boikokobetso re galaletsa botlhale jwa ditsela tsa gago, re ineela ka tsholofelo ya bongwana mo go wena gore o re goge jaaka Rara. Re a kopa mo go wena, re re: O re goge ka seatla le dikaelo tsa gago, mme mo bofelong o re amogele mo kgalalelong ka Jesu Keresete, Morwao yo o rategang, Morena le Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 255 - 237/247

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.